

華嚴經普賢行願品疏卷六

唐罽賓國三藏般若奉詔譯 澄觀述疏

◎解脫長者章

△第五解脫長者寄具足方便住。帶真隨俗，習無量善巧化無住故。文亦具六。

爾時善財童子隨順思惟，一心專念彼諸菩薩微妙辯才，莊嚴法門。一心專念彼諸菩薩言辭教海，一心專念彼諸菩薩微細方便，一心專念彼諸菩薩清淨解脫，一心專念彼諸菩薩善根光明，一心專念彼諸菩薩清淨善巧，一心

專念彼諸菩薩攝眾生智，一心專念彼諸菩薩廣大智力，
一心專念彼諸菩薩勇猛不退，一心專念彼諸菩薩殊勝志
樂，一心專念彼諸菩薩無量功德，一心專念彼諸菩薩無
礙法門。

第一依教趣求中二。一修證前法。二趣求後友。前中亦
二。先明思修。後彰修益。今初。有十一句，初總。餘
別。總中，微妙辯才，即前妙音陀羅尼，二本皆有陀羅
尼言。莊嚴法門即輪字法門。於此二門隨順義理，心無
異緣，故云一心。餘句別中，以總該別，皆著一心專念

之言。二經並無。而十句中各有修相。謂一深入語言。二憶念方便。三觀察解脫。四成就善根。五淨治善巧。六明利攝智。七堅彼大力。八不退志樂。九廣彼功德。其最後無礙義加總結。

如是思惟，弘誓堅固勇猛精進而為甲冑。以正信力，恆自莊嚴。勤求正法，心無疲厭。志願堅固，猶若金剛及那羅延，無能壞者。恆於一切善知識教，奉順修行，常無間斷。於諸境界，心無染著。普門妙行，皆悉現前。普眼智光，照諸法海。圓滿諸地陀羅尼門。現見十方，了法邊際。以無礙智，普遍莊嚴。證解清淨無依法性。

顯示無對無二法門。超過一切最勝彼岸。入淨智門，永離諸想。能審觀察諸法實際。普知三世差別法門。普往十方差別世界。普見十方差別佛身。普入十方差別時劫。普觀十方差別業性。普轉諸佛差別法輪。普智三昧明照其心。心恆普入平等境界。如來慧光照觸其身。一切智流相續不斷。若身若心勢力自在。常不捨離一切佛法。以深信力，常得諸佛威神所加。以淨慧力，為諸如來光明所照。以誓願力，願身周遍一切剎網。一切法界普入其身。

後如是思惟下，彰修之益。益堅誓等諸法門故。

漸次遊行，經十二年至住林城。周遍詢求解脫長者。

二漸次下，趣求後友。十二年者，大同海雲。昔人表法云，自分勝進各修六度，故云十二。今更一解，六根對境，十二入中內外無著，方解脫故。故淨名云，諸佛解脫，當於眾生心行中求。賢首品云，於眼根中入正定，於色塵中三昧起。由此便成眼陀羅尼自在佛等。故十二年方見解脫。

既得見已，五體投地，頂禮雙足，起立合掌，白言，聖者，我今得與善知識會，是我獲得廣大善利。何以故。

善知識者，難可出現。難得聞名。難得逢值。難得親近。
。難得承接。難得同住。難得奉事。難令喜悅。難蒙開
曉。難得隨逐。我今會遇真善知識，是我獲得最勝善利
。如是展轉，難中之難。

第二既得見已下，見敬諮問。於中二。先見敬。自敘欣
慶者，希望多年故。

聖者，我已先發阿耨多羅三藐三菩提心。

後聖者我已下，諮問中二。先自陳發心。後諮問法要。

前中三。初總。次別。後結請。今初可知。

為欲值遇一切佛興故。為欲普聞一切佛名故。為欲普見一切佛身故。為欲普詣一切佛刹故。為欲普入一切佛會故。為欲普觀一切佛境界故。為欲普知一切佛意故。為欲普受一切佛記故。為欲普承一切佛力故。為欲普事一切諸佛故。為欲證悟一切佛法故。為欲隨順一切佛心故。為欲圓滿一切佛願故。為欲獲得一切三昧故。為欲照明一切佛智故。為欲莊嚴一切佛會故。為欲遍修諸佛本行故。為欲現見諸佛神通故。為欲具證諸佛智力故。為欲清淨諸佛無畏故。為欲聽聞一切佛法故。為欲受持諸佛

法輪故。為欲辨析一切佛法故。為欲住持諸佛教海故。
為欲守護諸佛法城故。為欲觀察佛所覺法故。為欲解悟
佛所證法故。為欲深入佛所知法故。為欲見一切佛法於
自身中出生故。為欲與一切菩薩同體故。為欲與一切菩
薩同類故。為欲等一切菩薩善根故。為欲觀一切菩薩所
學故。為欲同一切菩薩淨行故。為欲成一切菩薩所修故
。為欲滿一切菩薩波羅蜜故。為欲發一切菩薩清淨願故
。為欲入一切菩薩大願海故。為欲具一切菩薩大悲力故
。為欲至一切菩薩究竟處故。為欲獲得諸佛菩薩差別威
神藏故。為欲獲得一切菩薩智慧光明無盡藏故。為欲獲
得一切菩薩廣大功德三昧藏故。為欲獲得一切菩薩無量

威力藏故。為欲獲得一切菩薩無量神通藏故。為欲獲得一切菩薩大神變藏無窮盡故。為欲獲得一切菩薩大自在藏常現前故。為欲獲得一切菩薩淨妙色藏而莊嚴故。為欲獲得一切菩薩大慈悲藏教化眾生皆令究竟達彼岸故。

二為欲下。別陳發心之相。總有三相。初欲上窮佛境。次為欲聽聞下，欲罄盡法原。後為欲與一切菩薩下，欲齊菩薩行。

聖者，我今以如是心，如是意樂，如是希欲，如是勤求，如是思惟，如是渴仰，如是尊重，如是方便，如是勇

猛，如是究竟，如是謙下，來至聖者善知識所。

三聖者我今下，結請。謂結前發心之相，便為請問之端。故云以如是心，至聖者所。

我聞聖者善能誘誨諸菩薩眾。能以方便，開佛境界。示其道路，指其津濟，與其橋梁，授其船筏。普令一切截愚癡網，除顛倒障，拔疑惑箭，滌煩惱垢。照心稠林，破心迷執。令心潔白，正心諂曲。除心熱惱，使心清涼。迴生死流，趣涅槃道。令心遠離諸見牢獄。令心解脫貪欲繫縛。於染愛處令心動轉。隨順趣入一切智性。令

其疾到廣大法城。令其堅固無上大悲。令其安住究竟大慈。令其發起諸菩薩行。令其修習諸三昧門。令其悟入聖所證位。令其觀察諸法本性。令其增長普賢願力。於諸眾生其心平等。

第二我聞聖者下，諮問法要。於中二。先讚能誘誨，亦為問端。如云能開佛境界，則為請開。餘例此知。

唯願慈哀，為我宣說。菩薩云何學菩薩行，修菩薩道。隨所修習，疾得清淨，疾得明了，具足圓滿。

後唯願慈哀下，請說所疑。

△第三時解脫長者下，正示法界。於中二。先入定嘿示，後出定言答。

時解脫長者以過去積集善根力故，如來現在威神力故，文殊師利童子憶念力故，十方一切諸善知識本行願力所加持故。

前中，所以定中示者，依六度說，此位定增。即定起用

，方便始具。此位增修，方得後位心定不動。文中三。初彰入定因緣。宿善為因，表自修故。後三為緣。一主佛威力，表本覺故，二文殊念力，具信智故。已彰善財因文殊故，三諸菩薩主伴力故。

即入菩薩勝三昧門。其三昧名普攝無邊一切佛刹旋陀羅尼。

二即入下，舉定名體。謂普攝諸刹在於身中。由唯心智，稱性總持。令如體用，旋轉無礙。故以為名。

入三昧已，其身清淨光明映徹。於其身中顯現十方各十佛刹極微塵數佛及佛刹淨妙莊嚴眾會道場光明等事。亦現彼佛往昔同行諸菩薩眾往昔所現神通變化，往昔所發廣大誓願，往昔所修助道之法，往昔所淨諸出離道，往昔所有清淨莊嚴，往昔所修諸菩薩行。亦見彼佛成等正覺轉妙法輪教化眾生。

三入三昧已下，明定業用。於中三。初總明普攝。二別彰多相。三令機見聞。初中分二。先明所現分量差別。

如是一切，悉於身中分明顯現，無有障礙。亦於身內一

切剎中普現其身無不充遍。身與佛剎互相涉入，不相障礙。種種色像而無往來。一一差別，次第而住，不相雜亂。

後如是一切下，結能所現自在之相。分明顯現者，身如明鏡現色像故。無有障礙者，此是總句，略有四義。一身中所現若依若正，互不相礙。故云一一差別，不相雜亂。二身與彼剎，無有障礙。以含剎之身，入身中之剎，無不充遍。是為內外一多無礙。故云身與佛剎，互相涉入，不相障礙。即此便有重重之義。謂含剎之身，入

身中之剎。身中剎內之身，亦能容剎。所容之剎，亦
能容之身。身身無窮，剎剎不盡。如鏡銅為像，對於明
鏡。鏡入像中，如剎居身內。像入明鏡，如身遍剎中。
則互現重重，歷然可睹。三本末無礙。若促大剎入於一
身，或張身令大以容諸剎，非不思議。互入重重，本相
如故，為不思議。故云種種色像而無來往。華藏品云，
以一剎種入一切，一切入一亦無餘，體相如本無差別，
無等無量悉周遍。四長者智持，明了無礙。如下廣說得
不思議解脫用故，故名解脫。

所謂種種佛刹各別莊嚴。種種眾會眷屬圓滿。種種威儀恭敬供養。種種道場各各嚴飾。其中諸佛示現種種遊戲神通。建立種種差別乘道。顯示種種廣大願門。普遍莊嚴種種神力。或一世界示現上生，處兜率宮而作佛事。或一世界歿兜率天，下入王宮而作佛事。或現處胎種種神變。或現誕生種種瑞相。或現嬰孩種種遊戲。或示童子現處內宮。或現出家示行苦行。或詣覺樹坐於道場。或現神通破魔軍眾。或現自在成無上道。或現諸王勸請說法。或現受請轉妙法輪。或現天龍乾闥婆等恭敬圍繞，常隨守護。或現其身遍入諸趣。或往一切眾生住處。或時示現度眾生已，入般涅槃，為令世間咸增戀慕。或

現舍利全身碎身，分布人天，令興福祐。或遍人天，起大塔廟，莊嚴國界，饒益眾生。彼諸如來於種種世界，種種趣生，種種部類，種種眾會，種種根器，種種樂欲，種種業行，種種信解，種種根力，種種修習，種種行願，種種覺悟，種種心想，種種煩惱，隨眠習氣，如是一切眾生海中，以佛威力，廣現神通，遍一切處，施作佛事。所謂或處極微塵量道場。或處無邊廣大道場。或處一由旬量道場。或處十由旬量道場。乃至或處與不可說不可說佛剎極微塵數諸世界海其量正等眾會道場。以種種神通，種種音聲，種種言辭，種種辯才，種種訓釋，於諸如來聖諦海中，以種種無畏大師子吼，為種種眾

生演說種種脩多羅海，開示種種陀羅尼門，普轉種種如來法輪，普授種種諸菩薩記。

二所謂種種佛剎下，別示多相。

彼諸如來所說法門，所出言音，善財童子悉能聽受，憶持不忘，思惟觀察。亦見諸佛及諸菩薩不可思議諸三昧門自在神變。

三彼諸如來所說法下，令機見聞。

爾時解脫長者現是相已，即從三昧安詳而起。

第二爾時解脫下，出定言告。於中四。一明起定，所作事辦故，說法時至故。

告善財童子言，善男子，我已於此甚深無礙莊嚴解脫門自在入出。

二告善財下，示定名體。無礙如前。莊嚴有二。一所現依正皆悉莊嚴。二顯現自在以為莊嚴。

善男子，我住於此解脫門時，即見東方閻浮檀金光明世界龍自在王如來應正等覺，道場眾會之所圍繞。毗盧遮那藏菩薩而為上首。又見南方速疾具足諸力世界遍覆普香王如來應正等覺，道場眾會之所圍繞，思惟心王菩薩而為上首。又見西方具足一切香圓滿光世界須彌燈王如來應正等覺，道場眾會之所圍繞，無礙心菩薩而為上首。又見北方袈裟幢世界金剛堅固如來應正等覺，道場眾會之所圍繞，金剛遊步勇猛行菩薩而為上首。又見東方一切殊勝妙寶世界無所得境界眼毗盧遮那如來應正等覺，道場眾會之所圍繞，無所得妙變化菩薩而為上首。又見東南方自在香燄光音世界香燈王如來應正等覺，道

場眾會之所圍繞，金剛燄慧自在妙因王菩薩而為上首。又見西南方智日燄普光明世界毗盧遮那普智聲如來應正等覺，道場眾會之所圍繞，普燄垂髻變現香華光菩薩而為上首。又見西北方普清淨妙香莊嚴藏世界無量功德海幢圓滿光如來應正等覺，道場眾會之所圍繞，無礙威力身智幢王菩薩而為上首。又見下方師子騰燄解脫光明世界無礙法界幢具足智慧燄光如來應正等覺，道場眾會之所圍繞，法界智燄光明遍照世界幢菩薩而為上首。又見上方光明遍照次第出現無盡佛世界名稱無邊無礙智慧圓滿光幢王如來應正等覺，道場眾會之所圍繞。無礙精進力法界智幢王菩薩而為上首。

三善男子我住下，說定業用。即普攝義。

善男子，我見如是十佛世尊而為上首，如是乃至見於十方各十佛剎極微塵數諸佛如來應正等覺道場眾會之所圍繞，一一皆有上首菩薩并諸眷屬分明顯現。然彼一切世界如來不來至此，我身亦不往詣於彼。

四善男子我見如是下，彰定體相。即無來去唯心觀故。所以次前明此定者，上已總彰三學。今明定慧之要，唯有二觀。一唯心觀。二真如觀。今此正辨為心，即心無心便入真如，故次明也。亦顯此位知眾生界無量無邊皆

心所現。知眾生空無作無性，即入如實。於中二。先結前所現體無往來。

△二善男子我若欲見安樂下，廣顯隨心見佛體相。於中四。一明隨心念佛諸佛現前。二正顯唯心念佛觀體。三以唯心觀遍該萬法。四結勸修學令證唯心。

善男子，我若欲見安樂世界無量壽如來，隨意即見。我若欲見白栴檀香世界月智如來，妙香世界寶光明如來，蓮華世界寶蓮華光明如來，妙金光世界寂靜光如來，妙喜世界不動如來，善住世界師子相如來，鏡光明世界月

覺如來，吉祥師子寶莊嚴世界毗盧遮那如來，如是十方一切世界所有如來，我若欲見，隨意即見。然彼如來不來至此，我不往彼。

今初。既了唯心，了心即佛。故隨所念無非佛矣。何難見哉。況志一不撓，精研造微。佛應克誠，於何不見。文中二。先橫辨十方隨心現前。

善男子，我若欲見盡過去際一切劫中所有諸佛，及彼佛刹種種莊嚴道場眾會，神通變化，調伏眾生，盡未來際一切劫海，所有如來及諸菩薩，莊嚴國土眾會道場，調

伏眾生，神通變化，如是一切，隨念皆見。彼諸如來及彼諸劫一切佛刹所有莊嚴種種差別，不來至今。我心亦不入彼過未。然其所見，皆如現在。

後善男子我若欲見盡過去下，豎窮三際隨心現前。並結無來去。無來去相，次下當釋。

善男子，我能了知十方三世一切如來及諸菩薩國土莊嚴神通等事，無所從來，亦無所去，無有行處，亦無住處。亦知己身無去無來，無行住處。

第二善男子我能了知下，正顯唯心觀體。於中二。先總明相無往來，則體性寂然。

所以者何。

後所以者何下，徵釋所由。先徵意云，何以普見復無來往。

知一切佛及與我心皆如夢故，如夢所見，從分別生，見一切佛，從自心起。又知自心如器中水，悟解諸法如水中影。又知自心猶如幻術，知一切法如幻所作。又知自

心諸佛菩薩悉皆如響，譬如空谷隨聲發響，悟解自心隨念見佛。

後釋意云，了彼相虛，唯心現故。以我即寂之唯心，叩彼即體之妙用。能念所念，何動寂之相干。於中二。先別以喻顯。後結成唯心。今初。文有四喻，意含通別。通顯唯心，喻無往來。別喻兼明不入出等。一如夢喻。文自有二。初總喻。但取不實無來去義，則心佛皆夢。後如夢所見從分別生下，別喻。則佛喻夢境，能念之心喻其夢因故。上二句喻。下二句合。覺時起想，睡後夢

生。觀想分別，定中見佛。既從想現，明是唯心。故觀經云，是心是佛，是心作佛，諸佛正遍知海從心想生。既從想生，緣生非實。故所見佛，空無往來。般舟三昧經云，如夢見七寶親屬歡喜，覺已追念，不知在何處，如是念佛。又夢雖虛，異乎不夢。唯心見佛，佛亦非無。故般舟云，覺已念之，彼不來，我不往，而其事宛然，當如是念佛。會上二文非空非有，是為中道唯心念佛觀也。二水影喻，唯有別喻。器喻淨身，水喻自心，影喻見佛。但是水月皆可為喻。若月滿秋空，隨水而現。澄波皎淨，則月影圓明。水濁波騰，則光昏影散。有水

月現，曾何入來。無水影空，未曾出去。雖水中見月，誰能執持。雖不可持，非謂無月。心有定散染淨不同，見佛一多勝劣等別。佛既如影，故無一多勝劣去來入出等相。非空非有，中道觀成。若水喻心性，則佛之月影皆是眾生真心中物。心佛交徹，真唯心也。三如幻喻，亦唯別喻。有能幻法，方有幻事。無能念心，無所念佛。從心如幻，佛無所依。幻相不無，即唯心觀力。有無雙離，中道顯然。四如響喻，則有通別。通則世取緣成無性，則心佛菩薩並喻響空。後譬如谷響下，別喻。則聲喻心念，谷喻法身，響喻見佛，及與聞法聲擊空谷，

響似本聲。念叩法身，隨心聞見。故聲與響非合非散。空有中道，準前可思。上之四喻皆具四觀。一正是唯心。二唯心故空。三唯心故假。四唯心故中。融而無礙，即華嚴意。若皆具四，何用四喻。一欲廣唯心無性等故。二從增勝說，四義不同。謂夢喻不來不去。影喻不入不入。幻喻非有非無。響喻非合非散。又夢喻散心，意言分別故。水喻定心，同靜水故。幻喻起用心，如幻術故。響喻勝劣心，隨念見故。又前三喻見身。後一兼喻聞法。三中夢喻法身，但有想見，竟無見故。影喻報身，相明靜故。幻喻化身，隨意成故。又影喻是心是佛。

幻喻是心作佛。夢喻諸佛正遍知海從心想生。響喻隨心勝劣，見佛有異。具上諸意，四喻不同。

我如是知，如是憶念，所見諸佛，皆由自心。

後我如是下，結成唯心。明是心是佛。般舟經云，自念佛從何所來，我亦無所至。我所念即見，心作佛。心自見，心是佛。心是如來心，是我心見佛。此上攝境歸心。下又拂云，心不自知心，心不自見心，心有想為癡，無想即泥洹，是法無可示者，皆念所為，設有念，亦了

無所有空耳。此即彼經之玄也。若此中意，三觀齊驅，以性融相，則入重重念佛之境。已見德雲。

△第三善男子當知菩薩下，心該萬法。謂非但念佛由於自心。菩薩萬行，諸佛體用，凡聖等境，並不離心。如有偈云，諸佛從心得解脫，心者無垢名清淨，五道鮮潔不受色，有解此者成大道。佛尚心現，況復凡夫。夜摩偈云，心如工畫師，能畫諸世間，五蘊悉從生，無法而不造，如心佛亦爾，如佛眾生然，應知佛與心，體性皆無盡等。即斯義也。文中三。初明佛法唯心。次通辨染淨

由心。後結成佛法唯心。

善男子，當知菩薩修諸佛法。淨諸佛刹。積集妙行。調伏眾生。發大誓願。入一切智自在遊戲不可思議解脫法門。得佛菩提。現大神通。遍往十方一切法界。以微細智，普入諸劫。如是一切佛菩薩法，皆由自心。

今初即淨分依他。故上經云，若人欲了知，三世一切佛，應觀法界性，一切唯心造。晉經云，心造諸如來。

△第二善男子諸業虛妄積集名心下，通辨染淨由心。此段

十五行，舊經所無。文分四別。一總舉八識為迷悟依。二彰由迷悟成十法界。三結成迷執過患因緣。四雙明迷悟二相差別。

善男子，諸業虛妄積集名心。末那思量。意識分別。眼等五識了境不同。

今初。八識皆具。文有四節。一諸業虛妄積集名心者，此是總句。若通相說，明八識心皆是積集。末那已下，總中分別，彰餘七相。故楞伽云，心能積集業，意能廣

積集。而總含別義，即當第八。故云，若集起以解心，第八獨名心。集諸種子，起現行故。故今雖總，即當第八。諸業虛妄，是心之因。唯識論說，諸業習氣，與二取俱，熏識成種，前滅後現。皆由不了真實義諦，執我所，方習成種，故云虛妄。若楞伽意，不思議熏，不思議變，是現識因。取種種塵及無始妄想熏，是分別事識因。故云諸業虛妄。由有虛妄覆彼真識，成末那等七識波浪。二末那思量，是第七識。末那，標名。此方云意。思量，即是第七性相。恆審思量第八賴耶為內我故。依第八轉，還緣第八。故次明之。三意識分別，即第

六識。末那名意，意即是識。今此第六，是意之識，依第七故。然了別以解識，八識俱名識。今取能了種種差別，名為分別。四眼等五識了境不同者，隨所依根，用差別故。楞伽經云，心能積集業，意能廣積集，了別故名識，對現境說五。即上四節也。依唯識論，束上四節，為三能變。後二為一。依楞伽經，收上四節，為三種識。謂真識，現識，分別事識。古人亦將此之三識，配三能變，觀彼經文，意有不同。謂真識即是如來藏性，體無生滅。與生滅俱，非一非異，名阿賴耶。以為現識。故此一識含在總句。下佛菩薩覺於此相，便同本覺故。

。十卷七卷入楞伽經皆云，略則唯二。謂現識，分別事識。以其真識含在現識。故不應言七識為現。此中意云，由此諸識互相熏習，生死流轉。若能了達，則不流轉。故說八識為迷悟因。非如常說獨依真如有迷悟也。故問明云，眼耳鼻舌身，心意諸情根，以此常流轉，而無能轉者。迷悟之相，次下當說。

愚癡凡夫不能覺知。怖老病死，求入涅槃。生死涅槃二俱不識。於一切境妄起分別。又由未來諸根五塵境界斷滅，凡愚之人以為涅槃。

第二愚癡凡夫不能覺知下，彰由迷悟，成十法界。十法界中，二人為悟，謂佛菩薩。八人皆迷，謂六道二乘。文中分二。先明迷人。後彰悟人。今即初也。初二句即是六道。不知識體即是苦果，不知熏習以為集因，故常流轉。怖老病死，求入涅槃，即是二乘。上迷勝義為不覺知。今悟四諦故求滅苦集。生死涅槃二俱不識下，結成上過。此句總標。六道凡夫不識苦集，安知涅槃。二乘不了生空本是涅槃妙有，故求永滅。凡小俱迷生死涅槃其性平等，為俱不識。於一切境妄起分別下，別明不識之相。此句通明但妄分別，謂生死可滅，涅槃可證。

入楞伽云，不知世間涅槃無差別故，分別一切法與非法。又由未來諸根五塵境界斷滅凡夫愚人以為涅槃者，此別明不識涅槃之相。以小乘滅為涅槃故。謂未來根塵麤相斷滅，凡夫及與愚法二乘並謂涅槃以為真實。而不能知但離虛妄，未實滅度。耽三昧酒，妄謂涅槃。不取塵境，謂為有餘。根塵都滅，謂為無餘。寧知微細業相未滅。況復能知本來清淨。

諸佛菩薩自證悟時，轉阿賴耶，得本覺智。

二諸佛菩薩自證悟時，轉阿賴耶，得本覺智者，彰其悟人。菩薩是因，諸佛是果。自證悟時，義通因果。轉阿賴耶得本覺智，即菩薩地盡成佛之時。破和合識相，滅相續心相，顯現法身，智純淨故。名轉阿賴耶得本覺智。然本覺本有，名顯。法身，即合言證。始覺菩提，今日始成，可稱為得。今云得者，得始覺智，契於本覺。始本無二，名究竟覺。故名為得。斯即了達生死涅槃二俱平等。

善男子，一切凡愚迷佛方便，執有三乘。不了三界由心

所起。不知三世一切佛法自心現量。見外五塵，執為實有。猶如牛羊不能覺知。生死輪中無由出離。

第三善男子一切凡愚下，結成迷執過患因緣。於中初二句辨執。不知如來隨機說法，對二乘故，說有三乘。破於二乘，復說於一。故彼經偈云，三乘與一乘，非乘我所說。則非三乘亦非一矣。然迷佛方便，義則有之。梵本但云不悟此理，執有三乘。斯則牒上，謂不悟上來生死涅槃平等之理，見上迷悟，謂有三乘。言不了三界由心所起者，此句辨迷。六地經云，三界所有，皆一心作

。七卷經云，彼愚癡人，執有三乘。不說唯心無有境界。不知三世一切佛法自心現量者，釋上不了三界所以。以不能知唯心教故。七卷經云，彼人不知去來現在諸佛所說自心境界。言自心現量者，不同三量真現量也。謂不了萬境皆自心現，如心分量故。楞伽云，自心現見應當除滅。見外五塵執為實有下，示不了知心現量義。不知心現，謂有實故。同於翳眼，取外空華。若知唯心，三一俱遣。下彰過患，由不覺知，生死循環，轉無窮已。

善男子，佛說諸法無生無滅，亦無三世。何以故。如自心現，五塵境界本無有故。有無諸法本不生故。如兔角等，聖者自悟境界如是。

第四善男子佛說諸法無生無滅亦無三世下，雙明迷悟二相差別。於中二。先明悟相。後顯迷相。今初。謂悟真實唯識性故。於中亦二。先二句總標。佛說諸法無生無滅者，橫說心性。亦無三世者，豎說心性。後何以故下，徵釋。先徵意云，現見諸法有生滅等，佛教亦說，何得言無。釋云，由心現故，以心為因而現生等，既從緣

生即無生等。故梵本云，因如是故，知一切法本性無生。問明品云，法性本無生，示現而有生，此中無能現，亦無所現物。有無諸法本不生者，從無之有曰生，自有還無稱滅，無本自無，何能生耶。有若已有，復云何生。有法從緣，自他共中，求生叵得。無法無因，何得名生。無法若生，龜毛兔角悉應名生。有不生無，無不生有。無若生有，空華應生乳酪等法。有若生無，龜兔應常生毛生角。是知有無本自不生，猶如駝驢兔馬等類，決定無角。故忉利偈云，一切法無來，是故無有生，以生無有故，滅亦不可得。心法遷流，假說三世。色心之

體，無生性空。三世之名，依何而立。如兔無角，豈問此角為昔為今。聖者自悟境界如是者，結示也。上約教道，佛說無生。今約證道，唯佛菩薩自證無生。非無因矣。斯即名為自覺聖智。自覺聖智者，楞伽經云，一切法無所繫著，得如幻三昧。由如是知故得上來成本覺智。

善男子，愚癡凡夫妄起分別，無中執有，有中執無。取阿賴耶種種行相，墮於生滅二種見中，不了自心而起分別。

二善男子愚癡凡夫下，顯其迷相。對上二義，說二種迷。一對有無本不生故，云無中執有，有中執無。此有多意。一境從心現，空而謂有。三界唯心，有而說無。二生死本空，執為我法。涅槃不空，執為滅無。三世無常等，執有常等。出世常等，執無常等。四諸法性空，翻執為有。無性真理，卻執為無。若楞伽中，有四種無有建立，並無中執有。一無相建立。相即蘊界入，本空無相，執有法相。二無有見建立。見謂於蘊界處，起我人見。三無有因建立。因謂最初識，緣生無性，而計有因。四非有性建立。性即三無為，離有無性，而執定實

。此上四義既無而執有，則顯二空有而執無。故諸聖者離有無見，便了識性，成種種身教化眾生。二取阿賴耶種種行相者，對上覺自心現，今明不覺，故有執取。言種種行相者，謂執受根身，頓變器界，生滅遷流，不生不滅，如是等相。墮於生滅二種見中者，謂識恆轉，前滅後生，因亡果現。又見七識生，不知即是如來藏性隨緣所生，執為定生，即是生見。見轉識滅，不知但是業相滅故，謂賴耶滅，不異外道斷滅戲論。若準梵本，墮生住滅二種見中與楞伽同。謂生住為有，滅即是無，亦即是上有無二見。不了自心而起分別者，就人結過。謂

不了自心性無生滅，起心分別是是有是無故。楞伽云，云何外道惡見，謂不知境界自心分別現，於自性第一義見有見無而起言說。即其義也。問明偈云，眼耳鼻舌身，心意諸情根，一切空無性，妄心分別有。若能依上悟入境界，即如理而觀察，一切皆無性，法眼不思議，此見非顛倒，為可依也。

善男子，當知自心即是一切佛菩薩法，由知自心即佛法故，則能淨一切剎，入一切劫。

第三善男子當知自心下，結成佛法一切唯心。以上諸義，則知心為佛法根本。略舉二句。梵本具牒前文十句。

是故善男子，應以善法扶助自心，應以法雨潤澤自心，應以妙法治淨自心，應以精進堅固自心，應以忍辱卑下自心，應以禪定清淨自心，應以智慧明利自心，應以佛德發起自心，應以平等廣博自心，應以十力四無所畏明照自心。

第四是故善男子應以下，結勸修學，令證唯心。現知萬法不離自心。但修自心，萬行斯備。其猶欲得淨土，當

淨其心。非遣妄解。謂有計云，萬法皆心，即心即佛，驅馳萬行，豈不唐勞。故今廣明，心雖即佛，久翳塵勞，故萬行增修，令其瑩徹。又佛但說萬行由心，不說不修萬行為是。又萬行即心，修何礙心。文有十句。一如彼病人，非杖不起。煩惱病重，假善相資。二若無法雨，法芽不生。三對境忘心，斯為妙法，則六塵不染。故梵本云，於一切法，當念捨離。四離身心相，心則堅固。五忍辱謙光，自然卑下。六寂照內澄，皎然無瑕。七鑒達不遺，觸境穿徹。八恆沙佛德，蘊在我心。望齊至尊，故須發起。九與佛同性，法界普周。十以十力無畏

，自他明鑒。

善男子，我唯於此如來甚深無礙莊嚴解脫法門，自在入出。如諸菩薩摩訶薩住無礙智，行無礙行。於諸境界，無不通達。現前常得見一切佛廣大三昧。住一切佛無涅槃際成正覺門。普遍了知諸三昧海。所有境界能隨觀察。三世諸法悉皆平等。分身遍往一切剎海。入於諸佛無分別處。一切境界皆悉現前。常能觀察一切諸法。以圓滿智盡能說行一切菩薩功德行願。於其身中悉能顯現一切世界成壞之相。而於自身及彼世界不生二想。如是妙行，而我云何能知能說。

第四善男子我唯下，謙己推勝。無涅槃際，至下當釋。
餘文相顯。

善男子，從此南行閻浮提畔，有一住處，名遍無垢。彼有比丘，名曰海幢。汝詣彼問，菩薩云何學菩薩行，修菩薩道。

第五善男子從此下，指示後友。閻浮提畔者，此洲南際，表將鄰不退，亦得般若六度後邊，入智海故。住處名遍無垢者，心定不動，何有垢哉。又了無相無所分別，尤無垢也。比丘海幢者，定智業用，深廣如海。高出名

幢。正心不動，如海湛然。眾毒雜惡，不能撓亂。摧不正說，所以名幢。

時善財童子禮長者足。右繞觀察，思惟瞻仰。稱揚讚歎無量功德，念善知識能為救護。於善知識常生歡喜。依善知識發起行願。由善知識令我開悟。敬善知識心無違逆。事善知識無有詔誑。於善知識心常隨順。於善知識起慈母想，令我遠離一切顛倒。於善知識起慈父想，令我成就菩薩善法。如是思惟，深生愛樂，悲泣流淚，辭退而去。

禮辭可知。

淨空法師專集網站(簡)製作

華嚴經普賢行願品末會解脫長者章